

ՊԱՆԴԻՏՈՒԹԵԱՆ ԽՆԴԻՐԸ

II

Պանդխտութեան խնդրին նւիրած մեր առաջին յօդաճում ¹⁾ մենք աշխատեցինք խնդրի բնաւորութիւնը պարզել, հաստատելով հետեւեալ կէտերը.

1. Պանդխտութիւնը պէտք է բաժանել գաղթականութեան խնդրից, մինչդեռ այդ երկու գաղափարները իրար հետ շփոթում էին մեր գրականութեան և հրապարակախօսութեան մէջ:

2. Պանդխտութիւնը հետեւանք է սօցիալական աղատութեան, որ ամեն դասակարգ և ամեն երկրում մարդիկ չեն վայելել:

3. Իրաւունքի աղատութեան հետ կապւած լինելով, պանդխտութիւնը սօցիալական և տնտեսական հանգամանքների ծնունդ է:

4. Պանդխտների մէջ մենք որոշեցինք ներսի և դրսի պանդխտներ: Այժմ կ'աւելցենք, որ դրսի պանդխտութիւնը նշան է, որ հայրենի երկիրը բաւականաչափ աշխատանք չի տալիս, մինչդեռ ներսի պանդխտութիւնը ցոյց է տալիս, որ հայրենի գիւղը աշխատանք չի տալիս:

5. Մենք որոշեցինք, Կովկասեան հայերի մէջ, չորս կարգ պանդխտական կեանք վարողներ, և որոնցից առաջին երեք կարգի համար (ուսանողների, արհեստաւորների և վաճառականների) պանդխտական խնդիր չի ծագում այն պատճառով, որ նոցա գործը, գործելու միջոցը և դրութեան վիճակը որոշ են, մինչդեռ, ասացինք մենք, գիւղական-երկրագործ դասակարգի համար խնդիր կայ այն պատճառով, որ պանդխտութիւնը այդ շրջանում համարւում է ար-

¹⁾ Տես «Երևան», 1889 թ., № 11.

դիւնք գիւղական-տնտեսական պայմանների վատութեան և երկրորդ այն պատճառով, որ գիւղացի-երկրագործը պանդխտութեան մէջ չի շարունակում իւր արհեստը, այլ ղեգերում է անորոշութեան մէջ, հայթ-հայթելով իւր ապրուստը պատահական, անհաստատ և քիչ վարձատարող գործերով: Մենք նկատեցինք նաև, որ գիւղական պանդուխտը կապած է մնում իւր գիւղի հետ, նա պէտք է վերադառնայ և որ պանդխտութիւնը մեզանում տնով-տեղով չի լինում, այլ անհատներով և այն՝ գրեթէ բացառապէս տղամարդկանց կողմից:

Ահա կարճ բովանդակութիւնը մեր առաջին յօդածի պանդխտութեան խնդրի մասին, յօդածի, որը ինքը մի անալիզ է պանդխտութեան խնդրի: Անալիզով է սկսում ամեն մի խնդրի ուսումնասիրութիւն. և ի զուր չէր, որ մենք նոյն յօդածում յայտնեցինք հետևեալը՝ մեր հոգսը առայժմ այն է, որ պանդխտութեան խնդրի ուսումնասիրութեան համար հոգ պատրաստենք: Իսկ հոգ պատրաստել չէ ուսումնասիրութեան համար, երբ մամուլը կը գոհանայ միմիայն ողբալով գոյութիւն ունեցող երևոյթի մասին, առանց տարալուծելու երևոյթը և առանց քննադատութեան համար նոր հորիզոններ բացելու, որոշելով խնդրի դիրքը տնտեսական և սոցիալական կեանքի պայմանների ընդհանրութեան մէջ:

Եւ ահա թէ ինչու մեր առաջին յօդածը այդ առիթով վերջացրինք այս խօսքերով՝ «այն տեսակէտը, թէ գիւղացին պանդխտութեան է դիմում, որովհետև տգէտ և չիմար է, մենք համարում ենք միակողմանի, այդ դատողութիւնը՝ սահմանափակ, դորանից զուրս բերող եզրակացութիւնը՝ վաղածամ, հետևանքը ապարդիւն, մտքի, դիտողութեան և հետազոտութեան հորիզոնը և ծաւալը նեղացնող, սեղմող: Ընդարձակել այդ խնդրին վերաբերեալ տեսակէտները, որոշել այս վերջինները, — կը լինի, ասացինք մենք, պանդխտութեան խնդրին նւիրած մեր հետևեալ յօդածի առարկան»:

Գիւղական պանդխտութիւնը Անդրկովկասում յառաջանում է գլխաւորապէս նորանից, որ հայրենի գիւղում ոյժեր աւելի են, քան գործը պահանջում է: Այդ կարելի է և պէտք է այսպէս հասկանալ, որ հինգ բանւոր ոյժ կան մի այնպիսի ընտանիքում, որի ունեցած

տունը, հողը, այգին, խաշնը և այլն կառավարելու համար բաւական են չորս, երեք կամ երկու հոգի. տասը ոյժ կայ այնտեղ, ուր 9, 8, 7, 6 և աւելի քիչ ոյժեր բաւական են այդ ընտանիքի ամբողջ սնտեսութիւնը հոգալու համար: Եւ երբ գիւղական համայնքը, իւր ամբողջութեամբ առած, բաւականաչափ տնտեսական ոյժերի պահանջ չ'ունի, որպէս զի մի ընտանիքի աւելորդ ոյժերը կարողանան արդիւնաւէտ գործ ձարել նոյն համայնքի սահմաններում,— այդ ոյժերը դառնում են աւելորդ ոչ միայն իրանց սեպհական ընտանիքի համար, այլ և առհասարակ ամբողջ համայնքի համար:

Այդ՝ արդէն ոչ միայն իրանց ընտանիքի, այլ համայնքի համար աւելորդ դատւած ոյժերը իրանց ստիպւած են տեսնում պանդրխտութեան դիմելու՝ դէպի քաղաքները, ուր նոքա դառնում են արհեստաւորների և վաճառատների աշակերտներ, եթէ փոքր են, կամ մշակներ, բեռնակիրներ, բանւորներ՝ եթէ նոքա արդէն բաւականի հասակ առածներ են:

Բնական է, որ ներկայ ազգաբնակչութեան պահանջների համեմատ եթէ գիւղական կեանքը և տնտեսութիւնը աւելի զարգացած լինէր,— այն մի քանի տասնեակ հազար պանդուխտները, որոնք այսօր քաղաքներում իբր պանդուխտներ են ապրում, շահ կ'ունենային մնալ իրանց հայրենի գիւղերում: Բայց մի որոշ ծախսով դիմում են պանդրխտութեան, երբ, այդ նպաստաւոր պայմանները գոյութիւն չ'ունին իրանց համայնքում: Եւ որ գլխաւորն է, դէպի պանդխտութիւնը դրդող հիմնաւոր պատճառներից մի քանիսը այնպիսիք են, որ գծւար է շուտով նոցա հեռացնել ասպարիզից: Յայտնի է, որ Անդրկովկասում առհասարակ սակաւահողութիւն է տիրում, մի քանի գաւառներում անգամ այդ սակաւահողութիւնը հասցրած է ծայրայեղութեան: Յայտնի է նաեւ, որ գիւղական մեծ զբաղմունքներից մէկը—այգեգործութիւնը և առհասարակ պարտիզպանութիւնն է տափարակ տեղերում: Յայտնի է նաեւ, որ մանաւանդ երկաթուղային գծից հեռու տեղերում միջոց գրեթէ վաճառականական գնահատութիւնից դուրս մի արդիւնաբերութիւն է: Արդ, եթէ այսօր մի որ և է համայնքում հողը սակաւ է, ուրեմն այդ հողը իւր մշակութեան համար չի պահանջում գիւղում եղած բոլոր ոյժերը, իսկ միւս կողմից այգեգործութիւնը և պարտիզպանութիւնը թէ սահ-

մանափակ է և թէ քիչ արդիւնաւէտ, — մի կամ մի քանի տարուամայդ պայմանները կամ անհնարին է և կամ դժւար է փոխել:

Սակաւահողութեան չարիքի դէմն կարելի է առնել կամ նոր հողեր տալով ազգաբնակութեան կամ ջրանցքներ անցկացնելով, ուր դորա մէջ կարօտութիւն է զգացուում և կամ, վերջապէս, ցայժմ մշակող բոյսերի տեղ՝ մշակելով մի աւելի արդիւնաւէտ բոյս: Սրինակ, որպէս այժմ տարածուում է բամբակի մշակութիւնը՝ ի հաշիւ ցորենի, գարու կամ բրնձի մշակութեան թէ երևանեան նահանգում և թէ մի քանի ուրիշ տեղերում: Բայց կարելի է և խելացի է արդեօք յուսալ, որ սակաւահողութեան չարիքների դէմն առնելու այդ բոլոր երեք տեսակ միջոցները մի քանի տարիներում կը գործադրեն այն չափով, որ մեր բոլոր գիւղական համայնքները միանգամայն կարօտութիւն զգան իրանց բոլոր առձեռն եզած արական թէ իգական անձերի ոյժերի մէջ և պահանջեն նոցա ներկայութիւնը իրանց ծննդավայրերում: Ո՛հ! պէտք է աշխատել ամեն միջոցներով, որ մեր գիւղական համայնքները, զարգացնելով իրանց տնտեսական կեանքը, միշտ աւելի ու աւելի մշակ ձեռքերի կարօտութիւն զգան, բայց պանդխտութեան հետ կապած բոլոր խնդիրները կապել այդ յոյսերի հետ — այդ չը պէտք է, որովհետեւ նաև ապագայում, աւելի զարգացած տնտեսական պայմանների մէջն անգամ ոչ ոք չի կարող երաշխաւորել, թէ համայնքի համար աւելորդ ոյժեր չը պիտի դուրսբերուին ունենան: Ազգաբնակութիւնը աճելու ընդունակութիւն եթէ չ'ունենար, խնդիրը ինքն ըստ ինքեան կը լուծւէր. բայց որքան տնտեսական կեանքը զարգանալու ընդունակութիւնն ունի, նոյնքան և աւելի՝ ազգաբնակութիւնը աճելու ընդունակութիւնն ունի, այնպէս որ ոչ մի համայնք չի կարող ապահով կերպով յուսալ, թէ զարգացնելով իւր տնտեսական կեանքը՝ նա կարող է իւր բոլոր անդամներին ապահով և բաւարար ապրուստ տալ: Ահա ձեզ մի համայնք 500 տուն 3000 հոգով, որոնցից 1500 աշխատաւոր բնակիչներով: Այժմ այդ համայնքի աշխատութիւնների համար աւելորդ են 100 հոգի, որոնք և պանդխտութեան են դիմում: Թող այդ համայնքի տնտեսականը ժամանակով այնքան զարգանայ, որ նրան հարկաւորեն ոչ թէ 1400, այլ 2000 հոգի: Եթէ աշխատաւոր անձերի թիւը նոյն ժամանակամիջոցում աճի մինչ 2200 հոգի, բնա-

կան է, որ այդ տնտեսապէս աւելի լաւ ապագայում նոյն այդ համայնքի համար աւելորդ ոյժեր կը լինեն ոչ թէ 100, այլ դեռ 200 հոգի, որոնք կը դիմեն պանդխտութեան բոլորովին այնպէս, ինչպէս այժմ դիմեցին պանդխտութեան ենթադրական 100 հոգին: Չը պէտք է մոռանալ, որ մարդու աշխատելու ընդունակութիւնը բաւականի առաձգական է, այնպէս որ նոյն այժմեայ գիւղական ոյժերը կարող են շատ աւելի զործ կատարել, քան այժմ նոքա կատարում են, միայն թէ լինի զործ կատարելու:

Այդ բացատրութիւնից հենց այժմ բզխում է մի հետեւանք, որ մենք շատ և շատ կարևոր ենք համարում նոյն այս տեղում արձանագրել: Այդ այն է, որ ի զուր կը լինէր պանդխտութեան խնդիրը անքակտելի կերպով կապել գիւղական կեանքի զարգացման խնդրի հետ, որի հետ առաջինը ունի շփման կէտեր, բայց որից նա չ'ունի կատարեալ կախում: Իսկ երկրորդ՝ երկրի, մասնաւորապէս մեր գիւղական համայնքների տնտեսական կեանքի զարգացման խնդիրը շատ և շատ աւելի բարձր և աւելի կարևոր խնդիր է, որպէս զի կարելի և անգամ ցանկալի լինէր նորան կապել պանդխտութեան խնդրի հետ: Մեզ հարկաւոր է գիւղական կեանքի զարգացումը ոչ թէ նորա համար, որ քաղաքներում դեգերող պանդուխտները իրանց հայրենիքում մնային, այլ ցանկալի է և հարկաւոր այդ զարգացումը նաև անկախ դորանից, այսինքն եթէ վերջ ի վերջոյ թէկուզ մենք երկու-երեք անգամ աւելի պանդուխտներ ունենայինք, քան այժմ ունինք: Ահա երկու զրութիւններ, որոնցից առաջինը թող ներկայացնի այժմեայ վիճակը, միւսը՝ մօտիկ ապագան.

	Գիւղական	Գիւղական	
	ազգաբնակչութիւն	աշխատանք	Պանդուխտներ
Այժմ	1.000.000 հոգի	970.000 հոգի	30.000 հ.
Ապագայում. .	1.500.000 »	1.410.000 »	90.000 հ.

Զարգացնելով տնտեսական կեանքը, մենք այսպիսով միմիայն գիւղական աշխատանքով ապահովացնում ենք 560.000 հոգու չափ աւելի քան այժմ, տալով պանդուխտներ 60.000 հոգու չափ աւելի քան այժմ պանդուխտներ ունինք: Առանց պանդխտութիւնը, իբր երևոյթ, ոչնչացնելու, մենք ունինք 560.000 հոգի մշտակեաց և ապահով գիւղական հասարակութեան նոր անդամներ, — ահա ինչին

կարող է ծառայել տնտեսական պայմանների բարւոքումը. և ոչ թէ մենք ձգտեցինք այդ բոլոր բարւոքումները մտցնել երկրի մէջ միմիայն նորա համար, որ այժմեայ ենթագրական 30.000 հոգի պանդուխտները կարողանան իրանց տանը մնալ: Իսկ թէ ինչ գին ենք տալիս մենք ժողովրդի այդ աճմանը, ուրեմն թէ ինչ գին մենք տալիս ենք այն բոլոր պայմաններին, որոնք պէտք է ապահովացնեն նոցա վիճակը, դորա մասին արդէն բաւական ընդարձակօրէն խօսել ենք մեր անցեալ «Թիւ և Ոյժ» վերնագրով յօդաւորում:

Մենք կրկնում ենք՝ պանդխտութեան խնդիրը այն ձևով, ինչպէս նա ներկայանում է մեզանում՝ Անդրկովկասում, պէտք է ջոկել գիւղական տնտեսական կեանքի զարգացման խնդրից. սորա ծաւալը շատ կը փոքրանայ, եթէ նա կապւի առաջնի հետ, թէև նոքա շփման շատ կէտեր ունին:

Պանդխտութիւնը, իբր մի յոսանք հայրենի գիւղում արդիւնաւետ գործադրութիւն չը գտնող ոյժերի՝ մի ընդհանուր երևոյթ է և ոչ միայն ներկայիս համար. այլ նա կարող է մնալ նաև ապագայի համար, որպէս նա կայ աւելի ևս մեծ չափերով Եւրոպայի տնտեսապէս ամենազարգացած երկիրներում, ուր նահանգից նահանգ, գիւղից քաղաք, մասնաւոր դէպի գործարանական քաղաքները գիւղական ազգաբնակչութեան հոսանքը տնպակաս է: Իսկ տեղ տեղ այդ հոսանքը անցնում է անգամ տէրութեան սահմանները:

Մենք մինչ այժմ խօսեցինք այն պանդխտութեան վերայ, որը յառաջանում է գիւղական համայնքներում գործադրութիւն չը գտնող ոյժերի գոյութիւնից: Այդ է գլխաւոր հիմքը պանդխտութեան, թէև նա միակ պատճառը չէ:

Գիւղացուն իւր գիւղից ժամանակաւորապէս դուրս վանող պատճառները նաև այն են, որ նա հանդիպում է որ և է տնտեսական դժբաղդութեան, ինչպէս՝ հունձի փչանալը, վաշխառուին ղոհւելը և այլն: Բայց սոքա արդէն մասնաւոր դէպքեր են, և ոչ օրգանական պատճառներ պանդխտութեան, մինչդեռ ոյժերի աւելորդութիւնը պէտք է նկատուի, որպէս պանդխտութեան օրգանական պատճառը, մի պատճառ՝ որը բղխում է գործի

քուլթիւնից համեմատած մի համայնքի աշխատաւոր անձերի թւի հետ. մի յարաբերութիւն, որը յառաջանում է տնտեսական զարգացման ուրեմն քաղաքակրթութեան մի կողմից, իսկ միւս կողմից աղգաբնակութեան ամման, ուրեմն բնութեան ոյժերի անհաւասարութիւնից: Այն պատահական պատճառներից դէպի պանդխտութիւնը դրդող գիւղացիները միմիայն սոււարացնում են պանդուխտների թիւը մի որոշ ժամանակ, բայց նոքա չեն կազմում այն յարատե պանդուխտների կօրպուսը, որոնք պանդխտութեան մէջ ընտրում են իրանց համար մի երկարատե զբաղմունք և ապագայի յոյսեր են դնում իրանց այդ պարապմունքների վերայ, թէ որպէս ապագայ արհեստաւոր (հիւսն, որմնադիր, երկաթագործ, գրաշար, մեխանիկ, խոհարար և այլն) կամ ապագայ վաճառական կամ գործակատար կամ որպէս գործարանների հմուտ բանւոր, վաճառատների ու քարւանսարանների ամենքի հաւատարմութիւնը ձեռք բերած հաստատուն բեռնակիրներ և տան պահապաններ և այլն: Ահա՛ թէ ուլքեր են կազմում պանդխտութեան մեծ կօրպուսը և ոչ թէ նոքա, որոնք որ և է անակնկալ դէպքից տառապանքի մէջն են ընկնում և զիմում ուրիշ տեղեր, կրած փնասը մի կերպ դրստելու, բայց որքան կարելի է շուտով կրկին վերադառնալու և իրանց տան ու դաշտի գործը կրկին սկսելու և շարունակելու մոքով: Այս վերջինները, կարճ ժամանակաց կամ պատահական պանդուխտները առհասարակ ընտում են պանդուխտ գիւղականների ընդհանրութեան մեջ ամենաստորին տեղը. հանգամանքների ոյժով նոքա ստիպւած են բաւականանալ ամենաքչով, որովհետեւ նոքա կարող են կատարել միմիայն այնպիսի պաշտօններ, որոնց համար չի պահանջւում ոչ մի առանձին ծանօթութիւն ղեկավար անձերի հետ և ոչ մի որ և է մասնագիտութիւն, այլ միմիայն իրզիքական ոյժ: Այդպիսիների հաւակնութիւնը մի քանի շալիս փող աշխատելու ցանկութիւնից գէնը չի անցնում՝ տէրունական հարկը կամ մի քանի պարտքեր վճարելու համար:

Այդ վերջին տեսակներին, ասում ենք մենք, չը պէտք է շփոթել պանդուխտների սոււար մեծամասնութեան հետ, որը իւր հացրենի դիւղից դուրս վիճակ է որոնում և ոչ թէ մի աքանի շալիս փողի վաստակ: Զը պէտք է շփոթել թէ այն պատճառով, որ նոքա

ժամանակաւոր պանդուխտներ են և թափառող են աւելի, քան պանդուխտներ՝ բառիս բուն նշանակութեամբ, և թէ այն պատճառով չը պէտք է շփոթել, որ շատ բան, ինչ կարելի է նկատել յարատեւ պանդուխտների մասին՝ բոլորովին չի վերաբերում՝ պատահական կամ կարճժամանակեայ պանդուխտներին:

Յիշենք, վերջապէս, մի երրորդ տեսակի պանդուխտներին: Այդ նոքա են, որոնք պանդխտութեան մէջ միանում են պանդուխտների մեծ կորպուսի հետ, բայց որոնք դիմել են և դիմում են պանդրիտութեան ոչ թէ այն պատճառով, որ նոքա աւելորդ ոյժեր են իրանց ընտանիքում և իրանց համայնքում և ոչ էլ ստիպւած են այդ անելու որ և պատահական պատճառով, այլ պանդխտութեան են դիմում՝ գերադասելով քաղաքը գիւղից, գերադասելով քաղաքային արհեստները՝ գիւղական պարապմունքից: Այս կարգի մարդկանց մէջ էլ կան ստորաբաժիններ. զոցանից ոմանք կամ առանձին ձգտման և ընդունակութիւնների տէր են, ձգտումներ և ընդունակութիւններ, որոնց գործադրութեան համար ներկայ գիւղական կեանքը առհասարակ շատ նեղ է թւում և կամ մոլորածներ են, որոնք գործում են նմանողութեամբ կամ պարծենկոտութիւնից, թիւր գաղափար ունենալուց քաղաքի կեանքի մասին, որը նոցա աչքում համանիշ է հարստութիւն, լոյս, ուսում, գիտութիւն խօսքերին: Ահա՛ իսկապէս այն պանդուխտները, որոնց հեռանալը ծանրանում է իրանց համայնքի վերայ, քանի որ նոքա ունին այնտեղ և տուն-տեղ և կարելիութիւն՝ տնտեսութիւն զարգացնելու: Մինչդեռ իւր տանը աւելորդ ոյժ ներկայացնող, իսկ այժմ Թիֆլիս, Բաքու և այլ տեղերում աշխատողը ոչ մի կերպ չի ծանրանում համայնքի վերայ, ոչնչով չի խանգարում թէ իւր տան և թէ համայնքի տնտեսութիւնը, այլ ընդհակառակը՝ պանդխտութեան մէջ գտնում է մի պարապմունք, որից առհասարակ պէտք է զուրկ մնար իւր հայրենի գիւղում, դորա հակառակ այն վերջին տեսակի պանդուխտները միմիայն փոխանակում են գիւղի հաստատ պարապմունքը՝ քաղաքի աշխատանքի կամ գուցէ և պարապ շրջմոլիկութեան հետ:

Մեծ խնդիր է, թէ պանդուխտների մեծ կորպուսի մէջ այդ տեսակները ինչ տեղ են բռնում, նորա որ մասն են կազմում: Բայց

այդ մի խնդիր է, որի լուծումը, միևս հարցերի հետ միասին, պէտք է վերապահւած մնայ մասնաւոր հետազոտողներին։ Այդ բուն ստատիստիքական հարց է, որին մենք այսօր պատասխանել չենք կարող. բայց այն բոլորը, ինչ մենք գիտենք հայկական ընտանիքի և համայնքի կազմակերպութեան և հայ մարդու բնաւորութեան մասին, մեզ իրաւունք է տալիս պնդելու, որ լոկ ցուցամոլութիւնը մեծ տեղ չը պէտք է բռնէ դէպի պանդխտութիւնը դրդող պատճառների մէջ։ Պնդել, թէ քաղաքը մեր կովկասեան հայի համար այնքան գրաւիչ է, որ նա պատրաստ լինի թողնել իւր հայրենի գիւղում տուն, տեղ, արտն ու դաշտը, իւր հասարակական դիրքը և այլն՝ անյայտութեան աշխարհում դեղերելու համար, — պնդել այդպիսի բան մենք չենք կարող։ Արկածախնդրութիւնը մեծ տեղ չի բռնում հայ մարդու գործառնութիւնների մէջ. ընդհակառակը մենք ամենքս լսել ենք այն անհուն սիրող մասին, որ տածում է հայը դէպի իւր ծննդավայրը. լսել ենք և փաստերով համոզւել, որ մեր բնաւորութեան մէջ չէ՝ դատարկ տեղից հայրենի հողը թողնել։

Ահա այդ պատճառով է, որ աւալած, այսինքն մինչև որ հակառակ փաստերը և նոր դիտողութիւնները մեզ չը համոզեն հակառակն ընդունելու՝ առ այժմ կրկնում ենք, պանդուխտների թւի մէջ մենք պէտք է ընդունենք ոչ մեծ տեղ բռնող այնպիսիներին, որոնք արդիւնաբերող ոյժեր են իրանց հայրենի գիւղում, բայց և այնպէս արհամարում են այդ պարապմունքը՝ քաղաքում, աշխատելու կամ սպարդիւն կերպով ժամանակ անցկացնելու համար։

Իսկ պանդխտութեան երևոյթի մէջ իսկապէս ակտային կողմը ներկայացնում են այն պանդուխտները, որոնք այդ վերջին տեսակիցն են։ Անպայման պախարակելին՝ դոքա են։ Նւ աւելցնենք՝ եթէ հասարակաց կարծիք պէտք է կազմի ժողովրդի, համայնքների մէջ, այդ հասարակաց կարծիքը ամենից փրկարար ազդեցութիւն կարող է և պէտք է գործէ այդ կարգի մարդկանց վերայ, որոնց կորստաբեր ձգտումների դիմաց կարող է համայնքը դիմադրել իւր հասարակաց կարծիքի ոյժը։ Նւ եթէ մեր սպասածից աւելի էլ լինեն այդ տեսակի պանդուխտները՝ դորա դէմն առնելու միակ միջոցը մենք կրկին տեսնում ենք միմիայն հասարակաց կարծիքի ընդդիմադրող ոյժի մէջ։ Մինչդիռ, դորա հակառակը, հասարակաց կարծիքը կորց-

նում է իւր ոյժը, երբ խօսքը մի այնպիսի պանդխտականի մասին է, որը թողել է իւր հայրենի գիւղը՝ տեսնելով իւր ապարդիւնութիւնը, վարած լինի նա այդպէս իւր լազատ կամքով թէ տան մեծի կազարութեամբ:

Մի կարեւոր հանգամանք կայ, որը մասնաւորապէս հայական գիւղերում տուարացնում է աւելորդ ոյժերի թիւը: Այդ այն գերն է, որ կատարում է հայ կիւնը գիւղական տնտեսութեան մէջ: Յայտնի է, որ հայ կիւնը տնտեսական կեանքում մեծ դեր է կատարում՝ մասնակցելով տնային և դաշտային ամեն տեսակ նոյն իսկ ծանր աշխատանքներում: Զը լինէր կնոջ այդ մեծ աշխատակցութիւնը, — ոչ միայն մեր գիւղական արդիւնաբերութիւնը կը նւագէր զգալի կերպով, այլ և ներկայիս տղամարդկանց աշխատաւոր ոյժերը չէին բաւիլ կատարելու այն, ինչ այժմեայ նոյն իսկ դեռ քիչ զարգացած գիւղական կեանքը պահանջում է: Զը լինէր հայ կնոջ այդ աշխատակցութիւնը, բոլոր այժմեայ պանդուխտները, եթէ վերադառնային էլ իրանց գիւղերը, այնուամենայնիւ չէին կարող լրացնել նորանով գոյացած պակասը: Պանդուխտների աշխատաւոր ոյժերը միայն մի փոքր մասը կարող են կազմել այն աշխատաւոր ոյժերի, որ ներկայացնում են հայ գիւղացի կանայք՝ գիւղական տնտեսութեան մէջ: Եւ դեռ այդ կանացի ոյժերը կարող են մի քանի անգամ կրկնապատկել՝ կատարելագործութիւն մտցնելով նոցա աշխատանքների տեխնիկայի մէջ և ներմուծելով գիւղերը կանանց մատչելի նորանոր արհեստներ:

Մեր կովկասեան ազգերի ամենքի մէջ գիւղական կանանց աշխատակցութիւնը տնային և մանաւանդ դաշտային աշխատանքների մէջ հաւասար չէ. մեր դիտեցածին համեմատ, հայ կնոջ աշխատակցութիւնը աւելի մեծ է, քան թուրքերի և վրացիների մէջ: Ահա՛ ինչու հայ կնոջ մենք չիշում ենք իբր մի առանձին գործիչ (Փակտոր) պանդխտութեան խնդրի մէջ, պնդելով, որ նորա մեծ մասնակցութիւնը տնային և դաշտային արդիւնաբերութեան մէջ — շատ ընտանիքներում, մանաւանդ բազմանգամ ընտանիքներում աւելորդ է դարձնում մէկ կամ մի քանի տղամարդու ներկայութիւնը իրանց սահմանափակ անտեսութեան համար, դրդելով նոցա մի ուրիշ տեղ աւելի արդիւնաւէտ գործ որոնելու:

Մեծ դեր է խաղում այստեղ նաև հայի այս բնատրուշ չը դիտենք՝ յատկութիւն ասենք, թէ՛ սովորութիւնը՝ Մեր խօսքը այն քանի մասին է, որ անգործութիւնը, ծոյլ մնալը իսպառ հալածւում է մեզանում։ Մէկը, որ աւելորդ է, կարող էր նաև անգործութեան անձնատուր լինել, ապրել ընտանիքի հաշւով, և կամ եթէ այդ չը կայ՝ մուրացկանութեան տալ իրան. բայց զոքա, որպէս յայտնի է, հայ ընտանեկան և համայնական կեանքի սահմանադրութեան մէջ չեն մոնում։ Այդպիսի կեանքը արհամարում է և հալածւում աշխատութեանը սովոր հայ ժողովրդի կողմից, որով և պէտք է մեկնել հայ մուրացիկ-աղքատների սակաւութիւնը թէ գիւղերում և թէ քաղաքներում։ Կան աղքատներ—և Աստուած միայն գիտէ որքան շատ են նոքա,—բայց յայտնի մուրացողների թիւը աչքի ընկնելու չափ սակաւ է մեր տեղական հայերի մէջ։

Իսկ այդ բոլորը մի-մի գործիչներ են պանդխտութեան, այսինքն տանից և համայնքից դուրս գալու երևոյթի, ալլապէս՝ պանդխտութեան ինդրի մէջ, ինդիր, որը, ինչպէս տեսնում ենք, կեանքի շատ հանգամանքներն է յօշակում և տեղիք տալիս նորանոր հարցերի, որոնց հետ ծանօթութիւնը և որոնց լուծումը պիտի աշխատենք տալ աստիճանաբար։ Խնդիրը կապ ունի, որպէս պիտի տեսնենք, մեր քաղաքների աղքատնակութեան կազմի հետ, այս մոքով որ պանդխտների հոսանքը դէպի աշխատութեան մեծ կենտրոնները (և մեր խօսքը Անդրկովկասի մասին է) սկսեց սաստկանալ, երբ նոր գործարանական և առհասարակ արդիւնագործական և առւարական պահանջները Կովկասի քաղաքներում չը գտան գործին կպնելու բաւականաչափ տրամադիր, էլ չենք ասում պատրաստ դասակարգեր, քաղաքացու պատւի մասին կազմած կեղծ գաղափարը անհաշտելի համարելով շատ աշխատանքների հետ, որոնք «դրսի մարդու» փեշակներ պէտք է թւէին նոցա աչքում։

Մի մեծ բազդ կարող ենք համարել այն, որ մեր կովկասեան պանդուխտների համար կան մօտիկ կենտրոններ, ինչպէս են Թիֆլիսը, Բաքուն, Բաթումը, Երևանը։ Չը լինէին մեր երկրի իրա մէջ վաճառաշահ և գործարանական այդպիսի կենտրոններ—պանդխտութիւնը մեզանում կը փոխարկէր թէ հասարակական և թէ ազգային մեծ թշուառութեան, որովհետև այն ժամանակ նոքա ստիպած կը

լինէին գիմել մեր երկրից հեռու կենտրոններ, որտեղից կապ պահպանելը իրանց հայրենի գիւղերի և ընտանիքների հետ՝ մանաւանդ բանւոր և արհեստավոր մարդկանց համար կը լինէր չափազանց դժւարացրած, գուցէ և անհնարին դարձրած: Այդ վիճակի մէջ են թիւրքա-աշայատանցիները, որոնց մեծ դժբաղդութիւնը, այդ նկատմամբ, նորա մէջն է կայանում, որ երկրի իրա մէջ չը կան ոչ միայն Կ. Պօլսի, այլ անգամ մեր Կովկասի մի քանի քաղաքների նման կենտրոններ, այնպէս որ այնտեղ իւր գիւղից հեռացողը երեսը պէտք է խաչակնքէ՝ լաւ համոզւած լինելով, որ պանդխտութիւնով իսկապէս իւր ապագայ գաղթն է նախապատրաստում...

Ահներև է, թէ որքան և որքան մեծ շահ ունինք ոչ միայն գիւղական համայնքները առաջադիմած տեսնել, այլ տեսնել կենդանի գործարանական կենտրոնների փոխարկւած այժմեայ համեմատապէս մեռած քաղաքները, ինչպիսիք են Երևան, Ալեքսանդրօպօլ, Վարս, Գանձակ, Շուշի և այլն և կամ նոցա մօտ եղած բայց ապագայ խոստացող այժմ աննշան տեղերը: Որքան մօտիկ են այն կենտրոնները, ուր կարող են դիմել իրանց գիւղերում գործ չը ձարող գիւղացիները, այնքան աւելի նւագած կը լինի այն փնտր, որ կարող է յառաջանալ իւր ընտանիքից և համայնքից հեռանալուց: Եւ քանի որ մենք ապացուցած ենք համարում, որ պանդխտութիւնը յառաջանում է գլխաւօրապէս աւելորդ համարւած ոյժերի գոյութիւնից, և քանի որ ապացուցած ենք համարում, որ աւելորդ ոյժեր կարող են լինել նաև գիւղական համայնքների աւելի զարգացած տնտեսական պայմաններում, ուրեմն ապագայում, և երրորդ՝ քանի որ պանդխտական կենտրոնները հայրենիքից հեռու են, — այդ բոլորից պարզ երևում է, թէ ինչ դիրք պէտք է բռնել պանդխտութեան խնդրի դիմաց: Պանդխտութիւնը պէտք է ընդունել ոչ որպէս մի ժամանակաւոր երևոյթ, այլ որպէս մի յարատև երևոյթ, նոյնքան օրգանապէս կապւած ոչ միայն մեր՝ հայերի, այլ առհասարակ մարդկային սօցիալական կեանքի հետ: Ժամանակով՝ չը նայած մեր գիւղական կեանքի անգամ մեծ զարգացման, պանդխտութիւնը ոչ միայն կարող է գոյութիւն ունենալ, այլ նա կարող է նաև աճել մինչ այժմեայ պանդուխտների թւի մի քանի պատիկը: Մեր մեծ

Հոգսը պէտք է այն լինի, որ պանդխտութիւնը չը տարածւի մեր երկրի սահմաններից դուրս և որքան կարելի է կենտրոնանայ մեր մէջի եղած քաղաքներում: Իսկ դորան կարելի է հասնել միմիայն զարգացնելով մեր գործարանական արդիւնաբերութիւնը:

Մեզ թերևս հարցնեն, թէ այդ բոլոր դատողութիւններից ինչ խնդիր է յառաջանում ներկայիս համար: Այս է յառաջանում, կ'ասենք մենք, որ, պանդխտութեան երևոյթը մեզ նման ըմբռնելով, մենք ոչ թէ ապարդիւն վայոցներով կը լցնենք մեր թերթի էջերը, անզօր յորդորներ կարդալով, որ բոլոր պանդուխտները իրանց գիւղը վերադառնան, այլ կը յարուցանենք և կ'ուսումնասիրենք պանդխտական շարժումը կանոնաւորելու և պանդուխտներին խնամելու խնդիրները: Այդ ենթադրում է ծանօթութիւն այն դերի հետ, որ կատարում է մեր պանդխտական շարժումը իբր կայող օղակ գիւղի և քաղաքի մէջ՝ թէ տնտեսական և թէ քաղաքակրթական ասպարիզում: Այդ մասին մի այլ անգամ:

ԱԻԵՏԻՔ ԱՐԱՍԻԱՆԵԱՆՑ